




Concello da Coruña

Area / Unidade EMPRESA PS0001 MACS	Documento 52718S00FR	Selo
Código de verificación  323G 4A4F 1L42 6O3Z 0AEO	Expediente 527/2023/28	
	Data 05-07-2024	
Asunto Bases SEMENTE a partir del curso escolar 2024-2025	Interesado	

BASES QUE REXEN A PARTICIPACIÓN NO PROXECTO SEMENTE “Unha empresa na miña escola”

Base primeira: Definición do Proxecto

O Concello da Coruña, dentro dos Programas de Difusión da Cultura Emprendedora, organiza unha nova edición do **Proxecto SEMENTE: “unha empresa na miña escola”**.

Co proxecto Semente preténdese fomentar os valores de emprendemento e cooperación, e o coñecemento do comercio xusto e da economía social entre os nenos e nenas que cursan entre terceiro e sexto de Educación Primaria e alumnado de Educación Especial nos centros educativos da cidade da Coruña.

Cada grupo participante creará e xestionará unha empresa, baixo a forma dunha cooperativa. Para elo deberá simular a realización dos trámites que realiza calquera empresa real: elaborar os seus Estatutos, solicitar o NIF, nomear aos seus representantes, solicitar a licenza de venda e decidir o capital inicial e os produtos que venderán. Ademais deberá elaborar os produtos coa finalidade de vendelos para recuperar o capital investido e obter beneficios.

SEMENTE proporciona, neste sentido, un contexto práctico no que se traballa de forma transversal algunhas das materias da escola, como son lingua española, lingua galega, matemáticas, coñecemento do medio, plástica, informática. Ao mesmo tempo, achégase ao mundo da empresa e as relacións laborais aos primeiros niveis educativos, favorecendo e desenvolvendo competencias e adquisición de coñecementos e hábitos vinculados á cultura emprendedora.

A realización do Proxecto Semente “Unha empresa na miña escola” coincidirá co curso escolar e finalizará coa venda dos produtos nun Mercado Escolar que se realizará a finais do mes de maio ou principios de xuño.

Base segunda: Obxectivos do Proxecto

Xeral

Promover a adquisición da competencia emprendedora, a través dun instrumento central: a creación e a xestión dunha cooperativa escolar de fabricación de produtos, que posteriormente venderán nun



Concello da Coruña

mercado. Para iso, o programa reproducirá situacións reais no proceso de constitución dunha empresa e as súas actividades.

Obxectivos Específicos

- Fomentar os valores de emprendemento e cooperación, nun contexto creativo e lúdico.
- Favorecer a autonomía persoal e a participación en diferentes contextos sociais.
- Impulsar o coñecemento do comercio xusto e da economía social nas escolas.
- Coñecer as normas básicas de funcionamento en grupo.
- Iniciar ao alumnado nos principios básicos de marketing, contabilidade, impostos...

Base terceira: Persoas destinatarias do Proxecto

As persoas beneficiarias de SEMENTE son o alumnado dos centros educativos, que cursan estudos entre terceiro e sexto de primaria, e educación especial, con sede na nosa cidade, que manifesten o seu interese a través da solicitude para participar no proxecto.

Base cuarta: Participación no Proxecto

Para participar no proxecto cada centro educativo deberá cursar a solicitude de inscrición.

O límite de participación no proxecto será de 22 cooperativas. No caso de recibir máis solicitudes das sinaladas anteriormente, os criterios de selección son:

1. Centros de Educación Especial por orde de inscrición
2. Aulas de educación especial de Centros Privados por orde de inscrición
3. Colexios Públicos por orde de inscrición
4. Colexios Privados por orde de inscrición

En cada cooperativa haberá un mínimo de 15 (8 en aulas de educación especial) e un máximo de 25 persoas participantes.

Unha vez recibidas todas as solicitudes e con acordo dos centros interesados, fixaranse datas e horas das sesións.

Base quinta: Desenvolvemento do Proxecto

Todo o itinerario do Proxecto SEMENTE desenvólvese durante o curso escolar.

1.- Formación (entre xaneiro e maio do curso correspondente):

5 sesións de formación sobre cooperativismo:

Impartiranse módulos, por parte de docentes expertos en cooperativismo, sobre o que é unha cooperativa, a súa constitución e desenvolvemento da súa actividade, así como da venda dos produtos que se elaboren.

4 sesións prácticas para a elaboración dos produtos:

Para a elaboración dos produtos o alumnado recibirá clases de apoio. Desde os centros educativos e por parte do Concello incentivarase a calidade e variedade dos produtos que se presentarán no mercado e que serán elaborados polo alumnado das cooperativas.



Concello da Coruña

O calendario e horarios para as sesións determinaranse en coordinación co profesorado do centro educativo.

2.- Actos do Proxecto Semente

- Solicitud e entrega de **Licenzas**: mes de abril.

As cooperativas participantes solicitarán e obterán a licenza de venda para o Mercado Semente nun acto protocolario que terá lugar no Salón de Plenos do Concello da Coruña. O Concello poñerá a disposición dos centros educativos o transporte escolar necesario para o traslado das persoas participantes (un máximo de 6 representantes de cada cooperativa). Ademais por cada cooperativa deberá asistir, polo menos, un/unha docente responsable que se fará cargo do alumnado.

Unha persoa representante de cada cooperativa expoñerá as súas experiencias e o obxecto da cooperativa á que pertence e solicitará ante a autoridade o permiso para vender.

- Celebración do **Mercado Semente**: finais de maio /principios xuño.

As cooperativas participarán no Mercado Semente, no que realizarán a venda dos seus produtos seguindo as recomendacións que se estableceron durante a formación. Para iso, o Concello da Coruña poñerá a disposición de cada cooperativa escolar o transporte para o traslado das persoas participantes e unha carpa con mesa e cadeiras destinada á venda, que deberá ser atendida polos/as membros da cooperativa no horario de celebración do Mercado Semente.

O lugar e data de celebración do Mercado comunicarase aos centros educativos no mes de marzo. O Concello poderá dispor a celebración noutra data ou espazo no caso de que as circunstancias meteorolóxicas o aconsellen.

Base sexta: Distincións e premios do Mercado Semente

Participarán nos premios do Mercado Semente todas as cooperativas que venden os seus produtos nas carpas habilitadas polo Concello.

Outorgaranse **tres premios**:

- Un premio ao centro educativo máis implicado: cheque regalo de 300€ para material escolar.
- Dous premios para as cooperativas que destaquen entre as participantes no Mercado. Estes premios consistirán nun agasallo que se entregará a cada un/unha dos/as integrantes das dúas cooperativas.

Para a selección das cooperativas gañadoras teranse en conta os seguintes criterios:

1. Decoración da carpa.
2. Publicidade e promoción.
3. Variedade e orixinalidade do produto.

O fallo será emitido segundo a puntuación outorgada por unha Comisión de Valoración formada por tres membros: unha persoa docente das sesións de formación e dous representantes do Concello da Coruña. Unha das persoas representantes do Concello actuará como presidenta, levantará acta e, no caso de empate, decidirá co voto de calidade.

O fallo farase público no propio Mercado, no momento da entrega de premios.



Concello da Coruña

Base sétima: Existencia de crédito

Os gastos do Proxecto Semente financiaranse con cargo ao crédito dispoñible en vinculación da aplicación orzamentaria que proceda do orzamento xeral do Concello da Coruña para o ano correspondente, mediante un contrato tramitado para estes fins.

Base oitava: Aceptación das bases

O feito de participar no Proxecto Semente implica o coñecemento e a aceptación destas bases.

A Coruña, na data de sinatura electrónica que consta no presente documento

A Técnica de desenvolvemento local

O xefe do Departamento de Emprego